

խմիչքների մասին Քեզ ճշգրիտ գաղափար տալու համար, կանչեցի ինձ մօտ մի քանի գիւղացի կանանց և ահա նրանց տւած տեղեկութեւնները գրի եմ առնում: Ինչպէս անցեալ նամակներումս, այնպէս էլ այս նամակովս ես Քեզ կը նկարագրեմ առանձին-առանձին վերնագրերով:

\* \* \*

### Բ Ն Ա Կ Ա Ր Ա Ն

Փէրիայում համարեան բոլոր գիւղերը թէ արտաքուստ և թէ ներքուստ նման են միմեանց. նրանք փոքր են և քառակուսի գծւածի նման, ուր չկան կանոնաւոր և լայն փողոցներ. փողոց կոչուող ծուռ-մուռ ուղիներն անհարթ են և կեղտոտ. շատ տեղեր լցւած են անասունների աղբակոյտերով, որ ամբողջ գարնան և ամառւան փուում են չորացնելու համար, որպէսզի այրելու աթար պատրաստեն: Այդ բոլորը մի առանձին տխուր տպաւորութիւն են թողնում մարդու վրայ:

Տները: Ահա այսպիսի փողոցներում, հողի մակերևոյթի վրայ փռւած են անտաշ քարերից ու ցեխից շինած հոգածածկ, գիւղական խրճիթները. նրանք շատ անշուք են, պարզ և նահապետական: Համարեան բոլոր գիւղերում, քիչ բացառութեամբ մի հարկանի են 3—4 արշին բարձր հողէ պատերով շրջապատւած և շինւած են իրար կողքի, խառնի-խուռն, այնպէս որ գիւղացիների մասնաւոր երթևեկութիւնը կատարւում է շատ անգամ տների կտուրների վրայով, մանաւանդ ձմեռ ժամանակ, երբ փողոցների ձիւնը հաւասար է կտուրներին:

Ընդհանրապէս տներն արտաքուստ մերկ են զարդարանքներից, դռները ցածր, իսկ առջևից ունենում են սրահներ: Տները շինում են իրենք տանուտէրերը, երբեմն մի երկու վարպետ վարձելով:

Ներս եմ մտնում: Տունը բաղկացած է երկու բաժան-մունքից. մի կողմում սենեակներն են, իսկ միւս կողմում